



# PREZIDÉNSIA KONSELLU MINISTRUS

VIII GOVERNUN KONSTITUSIONÁL



Gabinete  
Porta-Voz

## Komunikadu Imprensa

### Sorumutuk Konsellu Ministrus nian, iha loron 6 fulan-abríl tinan 2022

Konsellu Ministrus hala'ó sorumutuk iha Palásiu Governu, iha Dili, no aprova ona projetu Rezolusaun Governu nian, ne'ebé apresenta husi Primeira-Ministra ein ezersísiu, Armanda Berta dos Santos, ne'ebé fiksa **vaga sira ba promosaun pesoál integradu iha Rejime Jerál Karreira sira Administrasaun Públika nian ba tinan 2022**. Husi total vaga 866 ba promosaun, ne'ebé define ona iha Rezolusaun Governu nian, 41 ba Tékniku Superiór – Grau A, 122 ba Tékniku Superiór - Grau B, 190 ba Tékniku Profisionál - Grau C, 250 ba Tékniku Profisionál – Grau D, 164 ba Tékniku Administrativu – Grau E no 99 ba Asistente – Grau F. Vaga sira ne'e destina ba promosaun ne'ebé tinan-tinan Governu fiksa, liuhusi proposta Komisaun Funsau Públika nian, to'ó limite 10% husi total ema ba kada kategoria ka grupu profisionál.

Konsellu Ministrus delibera hodi autoriza Ministru Finansas, Rui Augusto Gomes atu halo **negosiasaun ho Banku Mundiál kona-ba kondisaun espesífika sira ba empréstimu hodi financia projetu fornimentu bee moos ba sidade Dili**. Projetu ne'e ho objetivu atu aumenta área kobertura ba servisu abastesimentu bee moos no hadi'a kapasidade institusionál BTL-EP nian. Projetu ne'e ho valór total dolar amerikanu millaun 123,37, iha ne'ebé USD 120,76 financia husi empréstimu ne'e rasik. Projetu ne'e ho durasaun tinan 7, hahú husi tinan 2023 to'ó 2029 no sei benefisia ba ema na'in- 82.300 husi munisípiu Dili nian.

Ministra Saúde, Odete Maria Freitas Belo, halo apresentasaun ida kona-ba faze oin-oin husi projetu ne'e no kona-ba pontu situasaun preparasaun nian ba prosesu aprovizionamentu projetu **konstrusaun bloku pediatria no kuidadus intensivus iha Hospital Nasionál Guido Valadares (HNGV -sigla iha lian portugés)** nian. Bloku ospitalár foun ne'e sei iha andar lima no área ida ne'ebé ho luan besik metru kuadradu rihun haat. Bloku foun ne'e sei oferese instalasaun sira ne'ebé adekuada ba nesesidade sira husi número pasiente nian ne'ebé aumenta ba beibeik iha HNGV, hodi promove melloria qualidade prestasaun servisu saúde iha país ne'e.



Palácio do Governo,  
Avenida Presidente Nicolau Lobato,  
Dili, Timor-Leste



# PREZIDÉNSIA KONSELLU MINISTRUS

VIII GOVERNUN KONSTITUSIONÁL



Gabinete  
Porta-Voz

Vise-Ministru Administrasaun Estatál, Lino de Jesus Torrezão, apresenta ba Konsellu Ministrus **opsaun polítiku-lejizlativa sira ne'ebé maka sai hanesan baze ba iniciativa hodi kria política nasionál ba arkivu públiku no privadu sira.** Iniciativa lejizlativa ida-ne'e ho objetivu atu implementa política arkivista nasionál, ho estabelesimentu no definisaun ba prinsípiu sira ne'ebé sei orienta ba jestaun arkivu, la depende ba formatu, suporte materiál fíziku no natureza informasaun ne'ebé kontein iha dokumentu sira instituisaun públika no privada nian.

Ikusliu, Ministru Koordinadór Asuntus Ekonómikus, Joaquim Amaral, halo apresentasaun ida kona-ba **progresu sira ne'ebé alkansa ona iha prosesu adezaun ba Organizasaun Mundiál Komérsiu (OMK).** Nesesidade apoiu nian iha nivel polítiku no tékniku, ba prosesu adezaun nian mós apresenta ona, liuliu atu aselera elaborasaun ba lejizlasaun pendente na reforma interna sira, ne'ebé ho objetivu atu fasilita atividade komersiál sira no kria ambiente ida favoravel ba setór privadu, nasionál no estranjeiru, nune'e bele kumpre prinsípiu jerál OMK nian. Apresenta mós roteiru indikativu ida husi faze tuirmai prosesu nian atu nune'e, to'o tinan-nia rohan, prosesu adezaun Timor-Leste nian konklui ona. **REMATA.**



Palácio do Governo,  
Avenida Presidente Nicolau Lobato,  
Dili, Timor-Leste